



05 MAY, 2025

ECE 2025 perkukuh Terengganu sebagai hab peralihan tenaga

Berita Harian, Malaysia

ECE 2025 perkukuh Terengganu sebagai hab peralihan tenaga

Kerajaan Terengganu bakal menganjurkan East Coast Energy (ECE) 2025 buat kali pertama bagi menerajui fasa baharu peralihan tenaga dan pembangunan mampan, sekali gus memperkukuhkan kedudukan Terengganu sebagai hab peralihan tenaga.

Penganjuran acara itu akan berlangsung pada 23 Jun hingga 24 Jun 2025 di Pusat Konvensyen Taman Tamadun Islam, Kuala Terengganu.

Timbalan Setiausaha Kerajaan Negeri (Pembangunan) dan Pengarah Unit Perancang Ekonomi Negeri (UPEN) Terengganu, Datuk Tun Ahmad Faisal Tun Abdul Razak, berkata inisiatif itu mencerminkan pendirian proaktif Kerajaan Terengganu dalam memposisikan diri sebagai hab bersedia masa hadapan untuk

peralihan tenaga.

"Kami melihat platform ini sebagai mekanisme utama untuk menyelaras dasar awam, inovasi industri dan kerjasama serantau dalam menyokong agenda transformasi tenaga negara.

"Acara ini turut menjadi peluang strategik untuk menarik pelaburan dalam tenaga bersih, meningkatkan kesedaran awam terhadap aspirasi sifar bersih, serta menggalakkan kerjasama yang lebih kukuh di seluruh koridor ekonomi Pantai Timur," katanya semasa sidang media East Coast Energy 2025, di Kuala Lumpur, baru-baru ini.

Ahmad Faisal berkata, Terengganu juga komited menerajui agenda tenaga boleh diperbaharui termasuk tenaga suria, penangkapan dan penyimpanan karbon

(CCUS), hidrogen hijau serta pembangunan infrastruktur mampan.

Sementara itu, Presiden dan Ketua Pegawai Eksekutif Kumpulan Terengganu Inc, Datuk Burhanuddin Hilmi Mohamed, berkata acara itu menjangkakan kehadiran lebih 800 delegasi, termasuk pembuat dasar, pemimpin industri, penyedia teknologi dan pendokong kelestarian.

"ECE 2025 akan menjadi platform utama di rantau ini dengan memperluaskan perkongsian ilmu dan peluang pelaburan, sekali gus menandakan satu pencapaian penting dalam memperkukuh peranan Pantai Timur untuk strategi tenaga nasional Malaysia.

"ECE 2025 turut digagaskan dengan empat objektif utama iaitu mewujudkan platform kukuh bagi dialog bermakna antara kerajaan,



Tun Ahmad Faisal (tengah) bersama Burhanuddin Hilmi (kiri) dan Naib Presiden Kanan Pelaksanaan Projek dan Teknologi PETRONAS, Ir Mohd Yusri Mohamed Yusof pada sidang media East Coast Energy 2025 di Kuala Lumpur, baru-baru ini. (Foto BERNAMA)

pihak industri, dan komuniti yang lebih luas serta menggalakkan kerjasama untuk penyertaan aktif komuniti tempatan dalam pembangunan dan keputusan berkaitan tenaga," katanya.

Beliau berkata, objektif seterusnya

adalah untuk menyerlahkan serta memaksimumkan manfaat sosio-ekonomi kepada perusahaan kecil dan sederhana (PKS), usahawan dan belia, bagi memastikan pembangunan tenaga membawa peluang kepada semua.